

**O‘ZBEKISTON RESPUBLIKASI PREZIDENTINING
FARMOYISHI**
**2023/2024 O‘QUV YILI UCHUN DAVLAT OLIY TA’LIM
MUASSASALARIGA O‘QISHGA QABUL QILISHNING DAVLAT
BUYURTMASI PARAMETRLARI TO‘G‘RISIDA**

Yoshlarning oliy ta’lim bilan qamrab olinishini yanada kengaytirish, shuningdek, O‘zbekiston Respublikasi Prezidentining 2022-yil 15-iyundagi “Davlat oliy ta’lim muassasalariga o‘qishga qabul qilish jarayonlarini tashkil etish to‘g‘risida”gi PQ-279-son qaroriga muvofiq:

1. O‘zbekiston Respublikasi Prezidentining 2022-yil 15-iyundagi “Davlat oliy ta’lim muassasalariga o‘qishga qabul qilish jarayonlarini tashkil etish to‘g‘risida”gi PQ-279-son qaroriga asosan:

a) 2022/2023 o‘quv yilidan boshlab:

Oila va xotin-qizlar qo‘mitasining tavsiyanomasi mavjud oliy ma’lumotga ega bo‘lmagan xotin-qizlar uchun bakalavriatning kunduzgi ta’lim shakli bo‘yicha umumiy belgilangan davlat granti asosidagi qabul parametrlariga qo‘shimcha 2 000 ta davlat granti ajratilishi;

respublikada faoliyat yuritayotgan xorijiy oliy ta’lim tashkilotlari va ularning filiallari hamda nodavlat oliy ta’lim tashkilotlarida (keyingi o‘rinlarda — nodavlat oliy ta’lim tashkilotlari) kadrlar tayyorlash uchun 1 000 ta davlat granti ajratilishi;

davlat oliy ta’lim muassasalari magistraturasiga ajratilgan qabul parametrlari doirasida bazaviy to‘lov-kontrakt asosida talabalikka qabul qilingan xotin-qizlarning to‘lov-kontrakt miqdori Davlat budjeti mablag‘lari hisobidan qoplab berilishi;

b) 2023/2024 o‘quv yilidan boshlab:

davlat oliy ta’lim muassasalariga o‘qishga qabul qilishning davlat buyurtmasi parametrlari faqat davlat granti bo‘yicha tasdiqlanishi;

davlat oliy ta’lim muassasalariga (moliyaviy mustaqillik berilgan oliy ta’lim muassasalari bundan mustasno) to‘lov-kontrakt asosidagi qabul parametrlari bo‘ysunuvi bo‘yicha tegishli vazirlik (idora) tomonidan Iqtisodiyot va moliya vazirligi, Oliy ta’lim, fan va innovatsiyalar vazirligi bilan kelishilgan holda tasdiqlanishi ma’lumot uchun qabul qilinsin.

2. 2023/2024 o‘quv yili uchun davlat oliy ta’lim muassasalariga o‘qishga qabul qilishning davlat buyurtmasi parametrlari:

bakalavrlar tayyorlash bo‘yicha kunduzgi ta’lim shakliga — 34 860 nafar etib, 1-ilovaga muvofiq;

magistrlar tayyorlash bo‘yicha — 8 923 nafar etib, 2-ilovaga muvofiq tasdiqlansin.

3. Davlat oliy ta’lim muassasalariga o‘qishga qabul qilish jarayonlarini muvofiqlashtirish bo‘yicha davlat komissiyasi (keyingi o‘rinlarda — Davlat komissiyasi) bir hafta muddatda 2023/2024 o‘quv yili uchun:

sogʻliqni saqlash, taʼlim, veterinariya, tibbiy-ijtimoiy xizmatlar sohalarida oliy maʼlumotli kadrlarga ehtiyoj yuqori boʻlgan hududlar uchun manfaatdor vazirlik va idoralarning buyurtmalariga muvofiq umumiy davlat granti asosidagi qabul parametrlari doirasida maqsadli qabul parametrlarining tuman (shahar)lar kesimidagi taqsimotini;

Oliy taʼlim, fan va innovatsiyalar vazirligi, tizimida oliy taʼlim muassasasi boʻlgan vazirlik va idoralarning takliflari asosida davlat buyurtmasi parametrlarining taʼlim tillari boʻyicha taqsimotini tasdiqlasin va eʼlon qilsin.

4. Tizimida oliy taʼlim muassasalari boʻlgan vazirlik va idoralar davlat oliy taʼlim muassasalariga (moliyaviy mustaqillik berilgan davlat oliy taʼlim muassasalari bundan mustasno) toʻlov-kontrakt asosidagi qabul parametrlarini 2023-yil 20-iyunga qadar Iqtisodiyot va moliya vazirligi hamda Oliy taʼlim, fan va innovatsiyalar vazirligi bilan kelishilgan holda tasdiqlasin.

Moliyaviy mustaqillik berilgan davlat oliy taʼlim muassasalarining Kuzatuv kengashlari 2023-yil 20-iyunga qadar toʻlov-kontrakt asosidagi qabul parametrlarini tasdiqlasin hamda qabul jarayonlarini tashkil etish uchun Davlat komissiyasiga taqdim etsin.

Qabul parametrlarini Vasiylik kengashi qarori bilan tasdiqlash vakolati berilgan oliy taʼlim tashkilotlariga qabul parametrlarini 2023-yil 20-iyunga qadar tasdiqlash tavsiya etilsin.

5. Oliy taʼlim, fan va innovatsiyalar vazirligi bir oy muddatda yangi kiritilayotgan bakalavriat taʼlim yoʻnalishlari hamda magistratura mutaxassisliklari boʻyicha:

Kambagʻallikni qisqartirish va bandlik vazirligi, Oʻzbekiston texnik jihatdan tartibga solish agentligi bilan birgalikda Oliy taʼlim yoʻnalishlari va mutaxassisliklari klassifikatoriga belgilangan tartibda oʻzgartirish va qoʻshimchalar kiritilsin;

malaka talablari, oʻquv rejalari hamda fan dasturlarining ishlab chiqilishini va belgilangan tartibda tasdiqlanishini taʼminlasin.

6. Xotin-qizlar va nodavlat oliy taʼlim tashkilotlariga ajratilgan davlat grantining oliy taʼlim tashkilotlari va bakalavriat taʼlim yoʻnalishlari boʻyicha taqsimoti yuzasidan takliflarni:

tavsiyanomaga ega boʻlgan xotin-qizlar boʻyicha — Oila va xotin-qizlar qoʻmitasi Oliy taʼlim, fan va innovatsiyalar vazirligi bilan birgalikda 2023-yil 20-iyunga qadar;

nodavlat oliy taʼlim tashkilotlari boʻyicha — Oliy taʼlim, fan va innovatsiyalar vazirligi 2023-yil 1-iyulga qadar tasdiqlash uchun Davlat komissiyasiga kiritilsin.

7. Mazkur farmoyishning ijrosini samarali tashkil qilishga masʼul va shaxsiy javobgar etib oliy taʼlim, fan va innovatsiyalar vaziri I.Y. Abdurahmonov belgilansin.

Farmoyish ijrosini nazorat qilish O‘zbekiston Respublikasining Bosh vaziri A.N. Aripov va O‘zbekiston Respublikasi Prezidentining maslahatchisi O.K. Abduraxmanov zimmasiga yuklansin.

O‘zbekiston Respublikasi Prezidenti
Sh. MIRZIYOYEV

Toshkent sh.,
2023-yil 15-iyun,
F-31-son